

KVW Senioreclub: en dedemesaledema ai 13 de forá ales 15:00 s'abinun te salff dles manifestaziuns d'Al Plan por n'aorela cõrta da carlascé con mascheres y tombola.

Oraziun da Taizé: la proscima oraziun de Taizé ven tignida en vendres ai 15 de forá ales 20:00 tla capela a Oies. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

Sorvisc ai Jogn Val Badia: le Saj chir animadusc/animadesses pro le proiet "Isté deboriada 2019". Sce t'as ligrèza da laoré con mituns y t'òs te fá na bela esperionza te cõsc ciamp dertan l'isté, spo lascete adentene pa nos. An mess avei arjunt la majerá ete por canche le proiet met man (8.7.2019). Por plü enformaziuns poste se scri a info@jogn.org o telefoné a ☎ 04745 23070 o diretamonter a Verena, ☎ 342 8427430. Les domandes pó gní dades jö anter la jöbia ai 28 de forá.

Comune de Mareo/1: le Comune preia der bel la jont y les firmes co despara da condü demez la nei y nia la meter sön urt de strada, olache le Comun messas spo la porté demez. Ara stá te tru ince a chi co mess desparé i marciapisc. Iolan dla comprenjiun.

Comune de Mareo/2: chi co ess ienn les comunicaziuns dal comun diretamonter ince por e-mail dess ti scri a margareth.rubatscher@comune.marebbe.bz.it comunican la misciun e-mail o ti telefone al ☎ 0474 503755.

Formaziun: Aste veia da emparé en mistier nõ? Este enteressé/ssada da laoré tal ciamp dai seniors y/o dles porsones con handicap? Spo té l'ocajiu y scriete ete ala formaziun a mez tomp da operadessa sozio-sanitara co ven tignida a Bornech o ala formaziun a mez tomp da operadessa-sozio assistenziala co ven tignida a Porsenú. La formaziun se basa sön 550 ores de pratica y 650 ores de teoria. Les leziuns de teoria ven tignides danmisdé 3 iadi al' edema. Les iscriziuns é davertes por porsones dai 25 agn ensö, dai 1 de forá ai 15 de merz tla scora por i laurs soziai "Hannah Arendt". Por enformaziuns plü avisa contateia la scora al ☎ 0471 973494.

Le Saltá: tal pröm Saltá dal 2019 gnarál endô motü ete i retrac dai nasciüs dal ann passé 2018. Por gauja dles desposiziuns sön la privacy, ne pón nia plü avei les listes dai nasciüs, porchel é düc i geniturs co á albü en viadú y co é a öna da publiché tal Saltá, der bel enviés da mené la foto de so picio/söa picera ala mail palfrader@rolmail.net anter i 25 de forá. Dlungia la foto vegnel perié da meter ennom y cognom dal viadú y data de nasciüda. Dijedele ennant! Belo danfora bel iolan.

Dõt le bun a:	Heinrich Trebo, <i>Raiscia</i>	* 10.02.1944
	Tone Erlacher	* 11.02.1930
	Signor ploan Heinrich Perathoner	* 11.02.1941
	Adolf Willeit	* 11.02.1944
	Eduard Rovara	* 12.02.1936
	Rosa Maria Erlacher Untersteiner, <i>Meransen</i>	* 12.02.1939
	Maria Rubatscher Feichter	* 15.02.1944
	y a düc chi co á santennom y complessc i agn cõst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina le dedemesaledema sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania
La Pli de Mareo
 Santa Maria dal Bun Consei

Ploan: Signor Heinrich Perathoner
 E-mail: ploania@gmx.net

Calogna Al Plan: 0474 501006
 Radio de Ploania: 93,00 MhZ



VAL BADIA
www.unitepastorala.org

Ann C

10.02.2019 - 5. domegna ia por l'ann

n. 11

Gnide do a mé! I fajará fora de os pesciadus de jont. Alleluia!

☞ Is 6, 1–2a.3–8 | 1 Cor 15, 1–11 | Lc 5, 1–11

Dal Vangelo do San Lúca:

Te chel tomp, ¹dertan che Gejú stea söla spona dal le de Genésaret, s'á abiné la jont encer el y orea aldí la parora de Dio. ²Danló ál odü döes barches sön spona. I pesciadus ea gnüs fora y laâ söes reis. ³Gejú é jü tla barca, co ea de Sciomun, y l'á perié de jí n toch dancierá dala tera. Spo s'ál sonté y ti ensinã ala jont dala barca enfora. ⁴Canch'al â roé söa pordica, ti ál dit a Sciomun: Va fora alalerial! Danló sciürede ostes reis por la pescial! ⁵Sciomun ti á respognü: Maester, i án laoré döta la net y i n'án pié nia. Mo sön túa parora sciürarái fora les reis. ⁶Cõsc ái fat, y ai á pié n te' gröm de pesc, che söes reis manaciâ da se scarzè. ⁷Porchel ti ái fat segn ai compagns tal'atra barca, ch'ai gness y i daidass. Ai é gnüs, y deboriada ái emplí entrames les barches cina al ur, ch'ares manaciâ da jí sot. ⁸Canche Sciomun Pire á odü cõsc, s'ál peté jö dan i písc de Gejú y á dit: Signur, va demez da me; i sun n piciadú. ⁹Deache el y düc sü compagns ea restá emprescionés y spordüs da odei tan de pesc ch'ai â pié; ¹⁰avisa ensciö ti éra ince jüda a laco y a Jan, ai fis de Zebedeus, co laurá deboriada con Sciomun. Spo ti á Gejú dit a Sciomun: No te teme! Da sen ennant piaraste jont. ¹¹Y ai á trat les barches sön spona, á lascé endô dõt cant y ti é jüs do.

Oraziun dal de

Periun! Dio, nosc Pere, i sun töa proprieté y i án motü döta nosta speranza te töa grazia: stasse dlungia te vigne debojügn y te vigne prigo y deidesse con töa proteziun. Por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.

(Lezionar C)



☞ Letöres dla 6. domegna ia por l'ann:

ler 17, 5–8 | 1 Cor 15, 12.16–20 | Lc 6, 17.20–26

Edema liturgica dai 10.02. ai 17.02.2019

DOM 10.	5. domegna ia por l'ann <i>Scolastica, Wilhelm, Silvan</i>
08:30	gran messa por dōta la ploania <i>oferta por i debojūgns dla ploania</i>
→ 14:00	funziun de rengraziamont dla vita y benedisciun dai pici mituns
10 y 18	<i>s.m. a Al Plan</i>
Lön 11.	memoria de Santa Maria da Lourdes - de mondial dai amarés <i>Anselm, Teodora</i>
14:30	a Longega s.m. en onú de Santa Maria da Lourdes
	s.m. por † Emma Frontull ved. Ellecosta
→ 19:30	Zelebrazion dla Parora de Dio, por le de mondial dai amarés
Ded 12.	<i>Gregor II, Benedet</i>
07:30	s.m. por la pêsc
	s.m. por vis y defonti d'Ansele
Dem 13.	<i>Adolf, Gisela</i>
18:00	<i>s.m. a Al Plan</i>
Jöb 14.	fešta dai Sanc Ziril y Metode (<i>patrons d'Europa</i>), <i>Valentin</i>
19:30	s.m. de rengraziamont por fam. Siegfried y Rita Burchia, Val
	s.m. por les Püres Animes
Ven 15.	<i>Siegfried, Faustin</i>
07:10	<i>s.m. a Al Plan</i>
Sab 16.	<i>Sabeda de Santa Maria Iuliana, Filipa</i>
18:00	<i>s.m. prefestia a Al Plan</i>
19:30	s.m. prefestia por †† Jan y Valeria Ellecosta, Gogn
	s.m. por † Vitoria Pedevilla Ellecosta, La Pli
	s.m. por † Angelo Ploner, Flô
DOM 17.	6. domegna ia por l'ann <i>I set sanc fondadús dal ordin d'Al Servic, Marzel</i>
08:30	gran messa por dōta la ploania y por i tomés y pordüs te vera, funziun te cortina <i>oferta por i debojūgns dla ploania</i>
10 y 18	<i>s.m. a Al Plan</i>
ampola:	por fam. Ritsch, Tomele da Rara
ministronc:	▶ da doman y domegna: Daniel y Manuel Pedevilla ▶ da sera y domegna: Pire Ellecosta y Alan Ellecosta
i recordun:	Notburga Agreiter Pedit, <i>Meghita/Desproch</i> + 15.02.2016



Na rei co arjunj i cörs (Lc 5, 1-11)

I ponsi do

La parora de Gejú n'é nia na empormetüda öta. Ara supereia vigne dificolté umana y ara é l'unico stromont por realisé na misciun co pö zonza speranza. Pire l'ascuta sö, al se fida, lascia döt y fej ci che Gejú dij. Y cösc é ci co ti ven damané a vigne discepul y porchel ince a me y a te: afronté les dificoltés, meter da na pert vigne dübe y ti jí do con convinziun a Gejú.

I preii ensciö

Al ea ma de bogn peiapesc, ince sce ai n'â pié dōta net nia. Ai ea esperc da sciüré fora les reis y ai â mans leries da partí i pesc. Spo cōsta encuntada con na porsona empü' demorveia, na usc, n comando tan "mat". Tan de dubi y n su ponsier: "Al é pa empö döt por nia, ... jí zoruch söle le ... de de...?" Mo les reis ven plenes y ince la barca, y ciamó plü plen é sen le cör: de ligreza. "Da sen ennant jareise a "pié" cörs, a sciüré fora reis de fidonza y speranza". I orun te gní do, Signur Gejú, i sun arjignés a sonté sö con te sön la barca dla dljia y jí fora sön i mers co aspeta amur.



Sce tö le dijes, Signur!

I án proé de vigne sort, riuniuns y sontades con discusciuns, de beles festes y funziuns de dljia, damané, scrit y mené fora invic ... La comunité dla dljia stonta da abiné adalerch la jont y da la motivé. „Maester, i án lauré dōta la net y i n'án pié nia.“ Te cōsta situaziun é Pire ciamó n iade bun da la meter da jí. Al fej n sforz y la vaiga cuntra l'esperionza de vigne peiapesc. **Sce tö le dijes, Gejú**, sciürarái fora les rëis. **Sce tö le dijes**, la prói ciamó n iade. **Sce tö le dijes**, proietei ciamó n iade danö. **Sce tö le dijes**, Signur, spo á ince cōsta tōa Dljia ciamó na poscibilité. Spo enviunse ciamó n iade, tignunse na funziun particulara, ti jun adancuntra ai atri ch'i aratun da n'abiné nia. Gejú ne dij nia: "Al sará saurí." Gejú dij ma: „Fále!“ *da „Image“*

La storia de Noé cuntada ai mituns (5)



Chelbeldio mena la gran plöia

Do set dis él gnü adalerch de gran nî fosc y con ei na tempesta da temei. Al â motü man da plöei y al plöea de y net tan dassen co che degügn n'â ciamó mai odü. Caranta dis y caranta nets ál ploü zonza lascé do. I rüs jea porsora y le mer â tosc curí la tera, i paisc, les ciütés, i ciamp y i bosc.

L'ega ea tan alta che ara stopâ cinamai les pizes plü altes dai crep. Endlunch olach'an ciarâ odén ega. Nia ne n'él plü romagnü de ci co viea denant sön la tera, degün tier, degüna porsona. Al n'ea gnanca plü i vicí t'aria, deache al n'ea nia plü lens olach'ai ess podü se lascé jö y palsé. Cösc ea le castigo che Chelbeldio ti â dé ala jont y ai tiers. Endöt 150 dis s'alzâ l'ega sön la tera, presc mez ann alalungia!